



Baština Akademije nauka i umjetnosti Bosne i Hercegovine

DIJALOG 3-4, 2018. Časopis za filozofiju i društvenu teoriju

Kukić, Slavo; Mujkić, Asim

2018

Akademija nauka i umjetnosti Bosne i Hercegovine

<https://bastina.anubih.ba/items/280a2e02-eca9-45be-9893-230f8afe1eb8>

Preuzeto s Baštine Akademije nauka i umjetnosti Bosne i Hercegovine

<https://bastina.anubih.ba/>

Predgovor

Još jedan broj Dijaloga je, i zbog toga smo istinski sretni, na uvidu znanstvenoj, ali i općoj javnosti – i u BiH i izvan nje. Nadamo se da će radovi u njemu, kao i u prethodnim brojevima Dijaloga, zaintrigirati čitatelje našeg časopisa, ali i definitivno ih opredijeliti da u njemu pronađu mjesto i za svoje intelektualno iskazivanje.

Najznačajniji dio prostora ovog broja posvećen je radu *A Physicalist Theory of Managing Impediments to Democracy and Peace Building in the Balkans*, koji potpisuje Rory Conces. Autor se, na što i sam naslov upućuje, bavi pitanjem prepreka izgradnji demokracije i mira na Balkanu iz perspektive jednog teorijskog pristupa. Jer, u pitanju je prostor postkonfliktnih društava koja predstavljaju izazov svima koji se bave fenomenom i demokracije i održiva mira. Za karakterističan primjer takvih društava on uzima BiH i Kosovo u kojima ljudi, iako su, kao i drugdje, satkani od mnoštva identiteta, biraju svoj etnonacionalni identitet kao određujući, a on ih nužno vodi na osjećaj pojačane solidarnosti unutar njihove etničke grupe i nepovjerenja prema svemu što dolazi izvan nje. Razumije se da takvo stanje stvari čini branu međuetničkim interakcijama i integracijama različitih etničkih zajednica. Stoga on traga za rješenjima koji omogućuju međugrupnu interakciju i solidarnost koja je, opet, pretpostavka izgradnje i održive demokracije i održiva mira.

Značajan dio ovog broja je, potom, posvećen i pristupnom predavanju, koje je u ANUBiH održao Ivan Markešić. Predavanje, naslovljeno kao *Religijske zajednice u Bosni i Hercegovini i izbori*, zapravo predstavlja analizu izbora 2018. godine i uloge koju su u njima, služeći “Božici Naciji”, imale religijske zajednice – koje su zbog tako koncipirane vlastite obveze temeljne vrijednosti nauka koji propovijedaju ostavile u potpuno drugom planu. Koristeći analizu sadržaja, kojoj podvrgava tekstove iz religijskih i svjetovnih tiskovina, autor na primjeru konkretnih izbora ukazuje na vrlo indikativne fenomene “religizacije politike” i “politizacije religije”, na “čvrstu koaliciju religijskih zajednica s ‘njihovim, izabranim političkim strankama’” u BiH prije svega – i slijedom te analize nudi “svoje viđenje uloge i značenja religije u društvu uopće”, ali se i osvrće na “značenje i ulogu religijskih zajednica u oblikovanju političkih zbivanja u Bosni i Hercegovini od 1990. do danas”.

Pored dva apostrofirana rada strukturu ovog broja Dijaloga čine još dva teksta – stručni rad *Kvalitet života i politika oporezivanja u Evropskoj Uniji* autorskog tima Marina Simović, Aleksandar Mihajlović i Miomira Kostić te tekst *Neki aspekti iz života i rada dr. Kalmija Baruha, jednog od najistaknutijih svjetskih hispanista i poznavalaca sefardike*, koji potpisuje David Kamhi, a koji je svojevrsno sjećanje na jednog od prepoznatljivijih sarajevskih židovskih intelektualaca XX. stoljeća. U svakom slučaju, uvjereni smo da će i ovaj broj biti inspirativan za sve koje interesira područje društvenih znanosti i filozofije, ali i čitatelje željne drugih informacija koje se unutar korica ovog Dijaloga mogu pronaći.

Urednici